

Ch L 5402.2 / 2902.8 B

2

T 5404 / 2902 B

CHINESE-JAPANESE COLLECTION  
HARVARD COLLEGE LIBRARY  
HOMER H. HARVARD-YENCHING INSTITUTE

JUN 28 1932



高季迪先生大全集卷之二

樂府

愛妾換馬曲

出帷掩紅袂離殿結青絲我取躡雲足君憐羞月姿  
惟當樹功業詎必戀恩私回首各已遠春山將暮時

美人磨鏡詞

匣中舊鏡龍蟠背昏盡如同月逢晦尋得街頭負局  
翁粉鉛和汞拭青銅須臾瑩徹無纖翳試整朝來暗  
梳髻光明還在只如新悔向塵埃久相棄明日照儂



自畫眉不須問郎宜不宜

朝鮮兒歌

朝鮮兒髮綠初剪齊雙眉芳筵夜出對歌舞木綿裘  
軟銅環垂輕身回旋細喉轉蕩月搖花醉中見夷語  
何須問譯人深情知訴離鄉怨曲終拳足拜客前烏  
啼井樹蠟燈然共訝玄菟隔雲海兒今到此是何緣  
主人爲言曾遠使萬里好風三日至鹿走荒宮亂寇  
過雞鳴廢館行人次四月王城麥熟稀兒行道路兩  
啼飢黃金擲買傾裝得白飲分餐趁舶歸我憶東藩  
內臣日納女椒房被禕翟教坊此曲亦應傳特奉宸

遊樂朝夕中國年來亂未鋤頓令貢使入朝無儲皇  
尚說居靈武丞相方謀卜許都金水河邊幾株柳依  
舊春風無恙否小臣撫事憶昇平尊前淚瀉多於酒

野老行

桑扈初鳴麥花豕小家蠶滿箔村中無吏夜捉  
人老身醉歸行失脚自從明府一下車短衣糲飯即  
有餘姓名免籍弓弩手新婦辟纊兒讀書縣門前頭  
柳飛絮春風又隨官馬去雞鳴相送拜道邊願公受  
取一大錢

秋江曲送顧使君

秋江月滿秋潮大江上行人待潮過別離休說渡江  
難半日順風兮心坐楚江茫茫蒹葭平使君來時雄  
雉鳴子弟從軍江去幾家猶住夕陽城水田雖荒  
飯常足芡米夜春二十斛誰道繁華不及前戶無征  
稅官無獄渡江渡江君莫畱江北樂似江南秋

湖州歌送陳太守

草茫茫水汨汨上田蕪下田沒中田有麥牛尾稀種  
成未足輸官物侯來桑下搖玉珂聽儂試唱湖州歌  
湖州歌情終闕幾家愁苦荒村月

秦箏曲

嬌絃細語發砑羅臂動玉釧鳴相和關雲隴月愁思  
多愁思多聽此曲停蜀琴罷燕筑

從軍行

關中惡少年召募去防邊匈奴入寇塞將軍下自天  
揚旌三道出列格五營連龍城望兵氣馬邑斷人煙  
星攢烽夜舉月偃陣朝圓渴飲疏勒水饑餐屬國瓊  
名勇單于憚功多天子憐寧令寶車騎獨擅勒燕然

大梁

大梁四面平如砥西去咸陽一千里魏王此地昔爲  
都宮闕中天碧雲起車聲輻輳夜未休帶甲十萬名

蒼頭撞鐘列鼎宴上客奉金走幣連諸侯信陵真是  
賢公子富貴不驕天下士已訪侯嬴到里門復迎朱  
亥經屠市傾身折節世莫同緩急竟賴斯人功邯鄲  
秦軍一推破七國震動聞英風古城重過爲搔首幾  
度秋風落楊柳沼上應無鴻鴈來苑中只有狐狸走  
立馬塵沙日谷昏悲歌感慨向夷門豪華多少同銷  
歇獨有高名今尚存

東飛伯勞歌

前飛蜻蜓後飛蝶桃葉楊枝每相接誰家季女弄春  
妍披煙暎日窗戶前金雀雙釵翠羽扇纈屏繡帳文

羅薦嬌羞年幾十五多將呈復隱奈愁何流暉倏沒  
百花暝空持可憐誰作竝

春江花月夜

皓月金波滿奇花玉樹新浮輝與流艷併弄一江春  
還持誰可比結綺閣中人

踏歌行

香塵和露踏成泥花下風寒鬢脚低夜靜高樓有人  
聽起頭一句唱教齊

子夜四時歌

白白復朱朱芳條冒繡襦摘來隨女伴賽鬪不曾輸

紅妝何草草晚出南湖道不忍便回舟荷花似郎好  
堂上織流黃堂前看月光羞見天孫度低頭入洞房  
空幃<sup>坐</sup>夜冷微紅滅郎意似殘灰無因得重熱

迎送神曲

薦芳兮奠醑斲冰爲梁兮葺荷以爲宇神不來兮孰  
與處空山愀兮暮多雨渺吾望兮瀟湘雲冥冥兮水  
茫茫有美人兮在堂盍歸來兮故鄉

導赤鯉兮從玄鼉冷風回兮水驚波儼靈旗兮來下  
巫撫節兮安歌安歌兮未急倏廻輶兮山之側南有  
淵兮北有湫神不畱兮我心憂願歲來兮惠我秋

有所思

有所思兮安在○煙霞迢迢隔南海○昔年遺我翡翠裘○  
篋中久閉銷光彩○宛如神仙在瀛州○乘濤欲至風引  
舟○同心之人乃離阻○嗟我處此將何求○

吁嗟篇

惻惻抱深隱靡靡踰崇丘凜凜歲欲徂役役車未休  
車未休但傷歲莫畱窮陰蔽九野徒旅同時憂  
豺虎路啼猿猴出林遊我飢雪作糧我寒又無裘  
徒思陽春日誰返羲和朝天時自有常淚下還復收  
擊筑吟贈張贊軍

擊筑上君堂君心不可忘哀聲流易水憤氣激咸陽  
不向諸侯座寧來刺客場今朝特前奏為我一停觴  
苦哉遠征人

悠悠荷戈子謫發事遠征遠征無窮期千里萬里程  
瞻斗知鄉遠覽物悟歲更霜露鑱肌膚弊鎧蟻虱生  
况茲三邊虜驕黠未易平聞笳已心摧赴刃仍骨驚  
軍興有嚴誅賤命顧自輕區區在行間敢望竹帛名  
奈何久不還主將功未成誰憐城南室思婦感鵲聲

鑿渠謠

鑿渠深一十尋鑿渠廣八十丈鑿渠未苦莫嗟吁黃

河曾開千丈餘君不見賈尚書

荆門壯士歌

水洶洶冰差差荆門葉黃杪秋時上有騰攫之猿猱  
下有饞嚼之蛟螭悲哉此路難孰敢徑渡之三撫髀  
壯士起劔風騷勞髮上指仰天長歌不見星哀鴻夕  
叫雲冥冥

城虎詞

候潮門開啼早鴉有虎忽入居人家母兒畏窟雞夫  
伏排籬突戶誰能遮猱風動樹初哮吼驚起東營捉  
生手怒拔長戈試一春日光落地俚魂走南山藜藿



深冥冥白日橫行誰敢櫻胡爲離窟來城市牙爪雖  
全不能恃君不見壯士遭急縛失路窮時亦如此

寒夜吟

月下凍痕生綠井隔簾霜片飛無影樹枝風息轉凝  
寒愁人如鳥棲未安夜短夜長應獨覺熒熒殘燭鳴  
鳴角

戍婦詞

妾在當奉姑郎行當報君男女各有役死生從此分

羈旅行

馬頭北風吹地白手冷時驚墮鞭策隻埃欲來雙埃

過客程不盡關山多狐狸縱橫古城壞旗折官亭無  
酒賣土風處處殊故園鄉音只聞僮僕言天涯歲晚  
無相識囊金已空歸不得暝投人家自炊黍土屋青  
燈鴈啼雨此時暫解羈旅憂夢與家人夜深語人生  
出門即苦辛何況長爲萬里身遠遊縱得功名好不  
如貧賤鄉中老

小長干曲

采菱葉尖妾采荷葉圓石城愁日暮各自撥歸船

春江行

春江南北疑無岸綠草綠波連不斷一女紅妝出浣

紗恰如鏡裏見桃花  
袂衣猶冷過寒食  
雲度春陰半  
江黑浦口風多潮正深  
輕舟搖蕩似人心  
鷓鴣暮啼  
歸路遠飛絮茫茫楚王苑

寄衣曲

郎寒甚妾寒持衣向燈泣  
不是手縫遲綿多針線澀

其一

賜袍非不煖妾製稱郎身  
寄去龍堆遠端愁到已春

廢宅行

嗚珂坊裏將軍第  
列戟齊收朱戶閉  
里媪逢人說舊時  
有廬被奪廣園池  
今年沒入官爲主  
散盡堂中義

宅兒廚煙久斷無  
梁肉羣鼠飢來入鄰屋  
官封未與別人居  
日日間苔雨添綠  
曲閣深沉接後房  
畫屏生色暗無光  
尋常不敢偷窺處  
守卒時來拾墜璫  
春風多少奇花樹  
又有豪家移得去

青樓怨

浴金熏爐鏤玉奩  
蘭香今夜爲君添  
烏棲黃昏鳥起曙  
纔見道來還道去

聞角吟

驚起黃榆塞下鴻  
一聲鳴軋戍樓空  
此時吹動關山意  
十萬征人歸夢中  
玉帳尋弓夜初起  
月白不知霜

似水餘聲散作滿天愁風吹不入單于壘

刺促行

刺促復刺促天高白日速黃鵠長苦飢烏鳶飛食肉  
促刺復促刺長途多荆棘但見今人行不逢古人跡

牧牛詞

爾牛角彎環我牛尾秃速共拈短笛與長鞭南隴東  
岡去相逐日斜草遠牛行遲牛勞牛飢惟我知牛上  
唱歌牛下坐夜歸還向牛邊卧長年牧牛百不憂但  
恐輸租賣我牛

捕魚詞

後網初沉前網起夫婦生來業淘水忽驚網重力難  
牽打得長魚滿船喜不教持賣去南津且向江頭祭  
水神願得年年神作主無事全家卧煙雨不論城中  
魚貴賤換得酒歸儂不怨

養蠶詞

東家西家罷來往晴日深窗風雨響二眠蠶起食葉  
多陌頭桑樹空枝柯新婦守箔女執筐頭髮不梳一  
月忙三姑祭後今年好滿簇如雲繭成早檐前繰車  
急作絲又是夏稅相催時

射鴨詞

射鴨去清江曙射鴨返迴塘晚秋菱葉爛煙雨晴鴨  
羣未下媒先鳴草翳低遮竹弓殼水冷田空鴨多瘦  
行舟莫來使鴨驚得食忘猜正相鬪背啞啞毛襪襪  
潛機一發那得知

伐木詞

竹擔挑多兩肩赤礪斧時尋澗邊石老夫氣力秋漸  
衰易斫喜有枯林枝白雲無人暗空谷遠聲丁丁如  
啄木暮歸待伴不獨行前途虎多荆棘生長年不曾  
到城府聞比山中路尤阻

打麥詞

雉雛高飛夏風煖行割黃雲隨手斷疎莖短若牛尾  
垂去冬無雪不相宜場頭負歸日色白穗落連枷聲  
拍拍呼兒打曬當及晴雨來怕有飛蛾生卧驅鳥雀  
非愛惜明年好收從爾食

采茶詞

雷過溪山碧雲煖幽叢半吐槍旗短銀釵女兒相應  
歌筐中摘得誰最多歸來清香猶在手高品先將呈  
太守竹爐新焙未得嘗籠盛販與湖南商山家不解  
種禾黍衣食年年在春雨

賣花詞

綠盆小樹枝枝好花比人家別開早陌頭擔得春風  
行美人出簾聞叫聲移去莫愁花不活賣與還傳種  
花訣餘香滿路日暮歸猶有蜂蝶相隨飛買花朱門  
幾迴改不如擔上花長在

洞房曲

洞房香吐合昏花月轉勾闌啼乳鴉今宵有酒畱君  
醉不信娼家勝妾家

待月詞

漏板敲愁夜驚冷露井桃花溼無影海風吹星銷碧  
煙羿妃妝遲鏡未懸素鸞不來桂香死雲外紫篁呼

夢起瓊樓欲開天半紅徘徊望拜娥池東蘭闥未返  
燈寒後恰似前宵待郎久

惜花歎

惜花不是愛花嬌賴得花開伴寂寥樹樹長懸鈴索  
護叢叢頻引鹿盧澆幾回欲折花枝嗅心恐花傷復  
停手每來花下每題詩不到花前不持酒準擬看花  
直盡春春今未盡已愁人纔畱片萼依前砌全落千  
英過別鄰懊惱園中妒花女畫旛不禁狂風雨流水  
一夜空黃鸝魂斷無言語縱有星星在蘇衣拾  
來已覺損光輝只應獨背東窗卧夢裏相隨高下飛

照鏡詞

君家青銅鏡價重比黃金空持照人面不持照人心  
田家行

草茫茫水汨汨上田蕪下田沒中田有禾穗不長狼  
籍只供鳧鴈糧雨中摘歸半生溼新婦春炊兒夜泣

憶遠曲

楊子津頭風色起郎帆一開三百里江橋水柵多酒  
壚女兒解歌山鷓鴣武昌西上巴陵道聞郎處處經  
過好櫻桃熟時郎不歸客中誰爲縫春衣陌頭空問  
琵琶卜欲歸不歸在郎足郎心重利輕風波在家日

少行路多妾今能使烏頭白不能使郎休作客

金井怨

照水羞見影汲水嫌手冷閒立梧桐陰烏啼秋夜永

送客曲

送客車在門勸客杯在手明日長安花今夜宜城酒  
願客飲此勿復辭我無黃金爲客壽人生無處無弟  
兄鄉里刺促誰知名賣書買得百金劍有身須向關  
山行馬四蹄車兩轂行人欲發休躑躅嚶嚶雞鳴赤

日旭

里巫行

里人有病不飲藥神君一來疫鬼却走迎老巫夜降  
神白羊赤鯉縱橫陳男女殷勤案前拜家貧無殺神  
勿怪老巫擊鼓舞且歌紙錢索索陰風多巫言汝壽  
當止此神念汝虔賒汝死送神上馬巫出門家人登  
屋啼招魂

主客行

主人楚歌客楚舞落日黃雲鴈聲苦笑拂腰間寶劍  
光美人滿堂色如土大兒北海人中奇小兒能讀曹  
娥碑相逢且莫歎貧賤但願有酒無別離君不見平  
原墓上生秋草國士無窮道傍老

春夜詞

杏燵溼鬢秋遷下銀蠟光寒曲屏畫數漏閒過每睡  
時月明微見墮游絲欲歸自踏娉婷影風動玉釵花  
亦冷屋貯嬌愁鎖幔紗青絲嘶騎醉誰家管絃不動  
空臺謝夢與烏衣語中夜

新絃曲

舊絃解新絃張冰絲牽愁六尺長寬急頻從指邊聽  
金鴈參差移不定新絃響高調易促不如舊絃彈已  
熟憐新厭舊妾恨深為君試奏白頭吟他日愁如舊  
絃棄泣向羅裙帶頭繫

竹枝歌

蜀山消雪蜀江深。郎來妾去鬪歌吟。峽中自古多情地。楚王神女在山陰。

其二

魚復浦上石纍纍。恰似儂心無轉廻。船歸莫道上灘惡。自牽百丈取郎來。

其三

江水出峽過夔州。長流直到海東頭。郎行若有思家日。應教江水復西流。

其四

躑躅花紅鴨鵝飛。黃牛廟下見郎稀。大編攤錢賣鹽去。短釵簪葉負薪歸。

其五

妾愛看花下渚宮。郎思沽酒醉臨邛。春衣未織機中錦。只是長絲那得縫。

其六

楓林樹樹有猿啼。若箇聽來不慘悽。今夜郎舟宿何處。巴東不在定巴西。

轉應詞

雙燕雙燕去歲今年相見。往來東舍西家。銜得泥中



落花。花落。花落。人在暮寒池閣。

其二

疎雨疎雨。綠滿薜蘿洲渚。江南相憶故人遠。水遙山暮。春暮春暮。風急畫船難渡。

五雜組

五雜組。駝背鞦韆。往復還。渡口船不獲已。非少年。

其二

五雜組。錦繡旗。往復還。更戍兒不獲已。遭亂離。

五噫歌

弔梁伯鸞墓

顧瞻亭臯。今噫丘墳有蒿。今噫鬻春亦勞。今噫危邦

可逃。今噫先生何高兮。

疊韻吳宮詞

筵前憐嬋娟。醉媚睡翠被。精兵驚升城。棄避愧墜淚。

鶴媒歌

鶴媒獨步荒陂水。仰望雲間飛不起。遠看過鳥下南汀。鼓翼相迎似相喜。共爲羽族生水鄉。暫從飲啄無猜防。草盾俄開中潛弩。弋師歡笑媒矜舞。嗟爾高潔非凡禽。胡爲徇食移此心。受人馴養忘遠舉。好陷同類機腸深。嗚呼世間幾人號君子。得利相傾亦如此。

牛宮詞

豕豢于苙雞棲于埭嗟爾烏捷何所止斯歲聿云暮  
雨霜以風乃築環堵以爲爾宮旣用爾力宜恤爾寒  
庇處密固我心孔安

照田蠶詞

東村西村作除夕高炬千竿照田赤老人笑祝小兒  
歌願得宜蠶又宜麥明星影亂棲烏驚火光辟寒春  
已生夜深然罷歸白屋共說豐年真可卜

琴操

風樹操

予自傷早失恃怙而作

朝風之飄飄兮維樹之搖搖兮吾思親之翹翹兮夕

風之烈烈兮維樹之揭揭兮吾思親之惓惓兮樹之  
有風猶可息兮吾之無親終不可復得兮

之荆操

予思秦伯之德而作

粵我有土岐山之下孰是營之維我考祖今我于邁  
自岐徂荆豈不懷歸念我弟兄民勿我思我斯安只  
國已有後先君季子

登丘操

登青丘有懷而作

驅車兮與馬蹇君行兮胡爲乎在中野登彼兮崇丘  
下茫茫兮九州思君子兮不得與駕以遊山有出雲  
兮木亦有柯我將歸兮憂之如何

望歸操 哀周復子死於虎而作

見旦而出于山之麓兮見夕不歸在虎之腹兮我往  
無所榛蒙籠被谷兮嗟爾耽耽弗食我豕犢兮穴亦  
有子胡寧使我獨兮

辭

望虞山辭

虞山峩峩兮出雲油油胡斂其施兮弗雨九州下有  
蛟龍兮海波橫流誰使子來兮從伯氏以遊朝于濟  
兮望岐周國有祀兮又何求唐虞逝兮道阻修慚德  
興兮干戈日休我思夫人兮心焉孔憂

放鶴辭

登支遁放鶴亭而作

放鶴去當高飛啄莫爭雞鶩食遊莫近虞羅機雲山  
海嶠堪來往明月千秋待爾歸

弔伍子胥辭

覽勾吳之故墟兮灌莽鬱其龍蔥館娃廢而爲沼兮  
歸伍胥之遺宮奚干祀而勿毀兮繫若人之死忠昔  
窮逋而渡江兮奮孤跡於羈旅旣入郢而雪恥兮又  
棲越而攘侮使彼吳之強大兮非夫子而孰爲何夫  
差之自喜兮遽忽戒而荒娛陳昌言之悃欵兮實不  
忍視國之阡危衆以子爲叵信兮肆讒辭之詆欺夫

豈不能全身遠適以自庇兮顧先王之舊德卒待隕  
而何言兮恨終不能悟君之屢惑載鴟夷兮浮游魂  
惇惇兮在中流江神念子兮哀憤鼓洪濤於高秋嗟  
君子之出輔兮孰不願為伊臯使言從而志行兮致  
雍熙之陶陶何齟齬而多患兮惟重華之不可以屢  
遭鄂侯諍而就醢兮龍逢諫而見屠蓋自古而有之  
兮匪夫子獨罹乎此辜身雖歿而義安兮又舍是將  
焉索彼循默而苟容兮寧獲免乎泚額想子猶念大  
故都兮或乘雲而來歸顧荆棘之多露兮應攬涕而  
歔歔余亦何為而感慨兮懼直道之墜也聊陳詞而

表烈兮亦邦人之志也

三言

梧桐園

桐花香桐葉冷生宮園覆宮井雨滴夜風驚秋鳳不  
來君王愁

三四言

王伯敬歌

舟初維琴始薦驛亭邊夜相見歌宛轉情綢繆解環  
珮彈箜篌歌易闌情難歇江波寒墮明月綠壺再傾  
芳音欲違譬彼林鳥逢晨各飛羅衣沾霜城鳥忽起

明日相思孤棹千里

高季迪先生大全集卷之三

五言古詩

擬古 十二首

暮暮牆下李芄芄陂中麥浩浩望遠塗悠悠思行客  
客行歲已盈紆鬱傷我情始知失羣鴻不若求友鶯  
登山知天高臨流識川阻不遣懷同心那知別離苦  
別離不可久寂莫不可守自傷紅顏子相思成皓首  
朝日如不晚行人會當返

其二

嗟峨雲間樓俯視層城陰綺戶相洞開清飈拂羅襟  
上有離居婦哀歌撫弦琴不知中怨誰掩抑一何深  
初爲郢中唱再奏邯鄲吟不惜努力歌寫作絕代音  
風吹落君耳萬里知愁心曲盡思寂寥青天日西沈  
安得化彩鳳飛去巫山岑

其三

出郭見丘墓累累滿山阿四海能幾人逝者何其多  
封樹日蕭條狐狸走蓬科英靈無人弔牧兒暮來歌  
浮華一世中倏若飛鳥過生時不肯飲死沒將如何

其四

離離白雲翔悠悠清川逝天地如傳郵閱人以爲世  
良時難再得游樂咸陽中咸陽名都會衣冠集王公  
南山對魏闕嘉樹何龍蔥九衢十二城逶迤迴相通  
衛霍開上第車馬爭春風娛意勿自惜當至百年終

其五

東井不可飲威弧孰能張虛名竟何用千古同悲傷  
與君初結歡金石比中腸恩情忽乖分相望阻川梁  
閨門尚難越况彼道路長不如雲中鴈迴飛自隨陽

其六

促織何嘖嘖空庭寒露白蘭蕙辭故芳高梧銷華澤

閨中覽物變感歎當此夕引領望遠人天河西南隔  
舟行詎離水針運恆依石君雖有棄捐妾心誓無易  
其七  
置酒北堂上歡言宴嘉賓嘉賓復爲誰相過盡朱輪  
中庖炙肥牛登俎悉異珍左右燕趙姝羅綺驕上春  
清謳雜哀吹響激迴高旻主勸客復酬中抱各以伸  
盛年易傾謝爲樂願及辰請看舊同遊半作泉下人  
無爲苦刺促長憂賤與貧

其八

美人一相見遺我白玉環上有雙雕龍遊戲在雲間

持此感深意佩結無時閒玉以比貞潔環以明不絕  
雲龍永相從誰能使離別

其九

秋至衆芳歇芙蓉獨鮮妍朱華照綠水日暮涼風前  
采折難遠贈相看自嬋娟孤艷豈足賞後彫良可憐

其十

明星爛東方北斗亦已旋獨宿悲夜徂空牀藉蘭荃  
雞鳴整環珮思奉君子筵君子行未歸新妝爲誰妍  
意疎覺去遙咫尺越與燕含情乏彤管何以寫中悵  
君如綆上瓶妾若井底泉不垂汲引惠澄瑩徒終年

其十一

人生一漚水所欲乃無涯志意苦未畢容華忽然衰  
天地有終壞誰能待其期聊爲一日歡勿作千載悲  
神仙俱好飲得醉復何疑

其十二

黃鳥鳴春陽流芳滿西園攀條日已暮悵惋不能言  
禦寒必重裘涉道須雙轅離居非君子何以解憂煩  
煩憂日已積佳期日已失思君如蓬萊可望不可即  
區區儻見察憔悴甘自畢

寓感

二十首

天旋海水運日月馳奔輝不知此往來伊誰幹其機  
諒由任元氣推遷不能違人生處宇內行止無定依  
唯當乘大化逍遙隨所歸

其二

雞鳴一警旦陽鳥已東昇羣動紛自起各欲赴其生  
飢蠖土中出棲禽林外驚蒼蠅一何微翾薨亦飛鳴  
人生信多故安得免營營

其三

盛衰迭乘運天道果誰親自古爭中原白骨遍荆榛  
乾坤動殺機流禍及蒸民生聚亦已艱一朝忽胥淪



陽和旣代序嚴霜變肅晨大運有自然彼蒼非不仁  
咄咄堪歎嗟滄溟亦沙塵

其四

美女生貧家光艷人未識遠聘入楚宮揚蛾欲傾國  
朝遊瓊臺上夕侍金輿側奉歡擬千齡秋風失顏色  
銜恩歸永巷貞意徒寂默高高天上星墮作水底石  
人事盡如斯推移歎何極

其五

叢蘭生路隅馥馥有奇香路隅多行人采掇成摧傷  
深林雖幽獨秋至靄餘芳托根在得所君子蹈其常

其六

蚩蚩此羣氓幾人出其儔誰云抱智慮乃足資勞憂  
晨秣思遠騁宵披務窮搜懷古復慨今百念紛相投  
膠擾得喪間若與方寸仇安知廣成子冥卧昆侖丘  
無營亦無想八表獨神遊

其七

大道本夷直末路生險巇杯酒出肺腑須臾起相疑  
田蚡掛竇嬰趙高誣李斯傾擠不少假權寵實蓄基  
鑿井當得泉種桑會成絲禍福皆自致天道信難欺  
出亡無所舍千載使人悲

其八

志士徇功業貪夫詫輕肥亦有逃羣子矯矯與時違  
彼此更共笑不知誰是非達人體自然出處兩忘機  
浮雲遊天表舒卷有餘輝

其九

攬轡登太行遙望洛北州嶠函正西峙黃河復東流  
百城無遺堵雲煙莽相繆朝作冠蓋塲暮爲狐兔丘  
昔人爭此地干戈迭相讐當其得意時連陌擁鳴騶  
百年奄忽盡魂魄空來游曷見采芝叟冥栖無所求

其十

桃李初不語鳳凰豈長喧末俗矜辯議窮口禍之源  
所以國武子殺身由盡言妙哉無爲謂默默道斯存

其十一

人言異草木不若松柏壽欲於百年間辛苦圖不朽  
形質天所畀名姓吾自取形名兩未立誰我竟何有  
不能知我先奚暇恤我後遺臭與流芳冥然付杯酒

其十二

短褐乘輶輅狐裘駕文車西門與北宮窮達一何殊  
彼達矜已智此窮媿身愚東郭發至言兩惑各以祛  
厚薄有定命巧拙果誰歟歸卧掩蓬室道存何所吁

其十三

駑馬放田野志本在豐草偶遇執策人驅上千里道  
顧非乘黃姿豈足辱君阜負重力不任哀鳴望穹昊  
奈何相逢者猶羨羈絡好

其十四

頽陽在川上玄蟬夕鳴悲嫋嫋風起波翻翻葉辭枝  
曠望天宇內沉寥此何時朱火已盈謝清商屆其期  
覽鏡忽自嗟綠鬢生素絲萬物有榮悴造化豈吾私

其十五

躑躅遠遊子驅車上高山高山多隴坂悲哉路何艱

其顛摩蒼穹欲上不可攀日暮牛力疲前征未能開  
雙輪忽中摧一墮深谷間引領望黃鵠失路何當還

其十六

蜀琴有奇紋本是枯桐枝一彈舞鸞鶴再彈下靈祇  
曾持薦黃帝雲中奏咸池棄置久不調流塵被朱絲  
終焉含妙響未始有成虧

其十七

達人貴全生外物等秋草顧此七尺軀即爲萬金寶  
昧者營所嗜棄捐不待老豈無室中資他人是來保  
何如餌金液長令鬢顏好

其十八

千秋取丞相一語悟君衷長孺多讜言白頭擯居東  
人命有通塞主聽無違從失如魚去波得若雲遇龍  
會合感冥相佳期諒難逢卞生未聞道無事涕沾鬢  
其十九  
南山多浮雲北山有高樹因風暫來依風回復飛去  
兄弟滿四海幾人此相遇握手交百歡分襟滋千慮  
蹤跡不可常無為嗟去住

其二十

鴻鵠橫四海鷓鴣戀蓬榛長松凌風煙小草亦自春

各稟造化育逍遙適其真無將赫赫者下比棲棲人

詠隱逸 十六首

向長

子平謝累辟雅志在隱居家貧或有饋取足反其餘  
讀易深自悟謂賤貴不如教言嫁娶畢家事無關余  
同好有禽生肆意相與娛茫茫五嶽去孰得回其車

周黨

世祖初厭武開觀在東都使者遍巖藪旌帛召賢儒  
伯况亦暫起綃頭詣尚書引見伏自陳始願不敢渝  
周興有恥食堯禪或羞汙士固有本志聖主焉能拘

范生乃見毀咄爾何其愚

王霸

儒仲有清節始一應徵命造廷抗高辭不肯臣萬乘  
歸來自耕野蓬藿掩門逕翩翩故人子相過容服盛  
一念見曹羞客去卧如病賴有賢婦言不失初守正  
嘉遯遂終身清輝兩相映

梁鴻

伯鸞古賢人乃在杵臼間夫婦共守志逃名入深山  
淒涼五噫歌東出過帝關齊魯復荆吳長往遂不還  
為傭豈無勞顧已少外患終葬烈士旁高風邈誰攀

法真

高卿關西儒好學賤榮祿閉門不交世弟子相誦讀  
太守者何人欲以吏見錄誓在南山南胡肯勞秦牘  
連徵終不就皦皦離垢俗郭子有頌詞玄德久愈暴

韓休

伯休始賣藥志將晦當時如何不二名乃為女子知  
玄纒強見聘使至焉得辭凌晨自先發不駕安車馳  
亭長遠迎候未識徵君誰修道奪其牛解與不復疑  
中途遂長遁蹤跡竟莫追乃知超雲驥塵轡何由羈

陳雷老父

漢袞黨獄起朝柄在刑餘皇皇外黃令去官返鄉閭  
班草逢故人涕泣語路隅邦危德無援忠良恐遭誅  
有叟過其旁植杖爲踟躕之歎且言何悲二大夫  
鸞鳳不隱羽安能免置喙欲問不肯顧飄然邁長途  
賢哉此老翁嗟嗟乃誰歟

龐公

南陽有龍鳳乘時各飛翻鴻鵠獨深棲不肯居籠樊  
皤皤隴上耕遠辱刺史軒豈不念子孫遺安乃名言  
采藥不復返亭亭空鹿門

王績

無功始亦仕季代遘亂屯投効乃徑歸不作嬰網鱗  
結廬河渚北喜與瘖士鄰相逢雖多言不若無語真  
種黍養鳧鴈逍遙度秋春乘牛過酒家畱連或經旬  
嗜飲豈沈湎醉鄉可逃身北門與樂署暫屈誠此因  
賢哉焦史妻相饋不厭勤酣歌自遺世嵇阮其能倫

朱桃椎

祭酒絕俗者曳索復被裘自匿林莽間不入城都遊  
織屨易米茗於人又何求惔惔高長史延見禮甚脩  
瞪視雖不言默教意已周欲使如曹參無事治一州  
忽去返山谷避寢安可畱

武攸緒

孽后移寶鼎同姓咸析珪獨去謝親寵龍門事冥棲  
澹泊如素嘗衣褐復茹藜賜器不肯御牀頭委塵泥  
族人豈不華回首已粉齏苟榮禍必集達識乃弗迷  
蟬蛻衆濁中名與嵩高齊

盧鴻

顛然守泰一高卧在幽壤開元始求治賢哲勞夢想  
詔書赴巖扃宸意勤挹仰入京遽還山孰得縻以鞅  
天子遂其高營室致安養爵祿不可加貪士應泚顙

秦系

公緒避時亂不駕戎府車南安大松間卜築聊可居  
穴石爲巨硯坐行老氏書刺史致羊酒歲時造其廬  
不拒亦不謝偃息每自如懷道誠可稱工詩乃其餘

陸龜蒙

魯望好任散心與太古期俗夫晨叩門不肯一見之  
下田與江通終歲恆苦飢菘刺不告勞常師禹胼胝  
酒酣發長歌猶有憤亂悲寧不念枯槁行哉豈其時

漢濱老父

漢濱有老翁初不語鄉里天子雲夢遊盼望臨沔水  
居人悉縱觀翁獨耕不已郎官下道問荅言野人耳

借問世立君豈將使爲理奈何從遊俠勞人奉諸已  
尚忍令人觀吾實爲子恥忽如驚鴻騫孰能躡其軌  
名姓且莫知赴哉志君子

張志和

超超玄真子游浪煙水中敝舟以爲家來往無定蹤  
自言處太虛四海長相從奴婢兩夫婦耕織粗可供  
天子不得見丹青繪其容漁歌復識聞山水邈其重

吳越紀遊十五首

始發南門晚行道中

歲暮寒亦行征人有常期辭我家鄉樂適彼道路危

酒闌別賓親驅車出郊岐我馬力未痛已越山與陂  
回頭望高城落日雲樹滋遭亂旣少安謀生復多飢  
途逢往來人孰不爲此驅遠遊亦吾志去矣何勞悲

渡浙江宿西興民家

挂帆無天風到岸日已夕捨舟理輕裝欲問古鎮驛  
颯颯灘聲迴莽莽山氣積僕夫夜畏虎告我勿遠適  
望林投人家炊黍旋敲石寒眠多虛警我體若畏席  
誰云別家遙數日已在客今宵始驚歎東西大江隔  
早過蕭山歷白鶴柯亭諸郵

客起何太早邨荒絕雞鳴况時江雨晦不得見啓明



凌兢度高關山空縣無城隔林聞人呼已有先我行  
側身避徑滑聚足防厓傾衣寒復多風聒聒遠水聲  
千峰霧中過不識狀與名嵐開見前郵始覺歷數程  
越禽啼楓篁冷日傍午晴煙生沙墟寂葉落澗寺清  
登臨亦可悅但恨時非平

次錢清謁劉寵廟

亭亭樹間祠落日小江口停舟拜孤像開幔蒼鼠走  
憶公治邦時德感山谷叟臨行謝其饋清風在茲久  
我方東征急不得奠杯酒惆悵出煙扉殘邨夜聞狗

登蓬萊閣望雲門秦望諸山

旅思曠然釋置身蒼林杪羣山爲誰來歷歷散清曉  
奇姿脫霧雨奮首爭欲矯氣通海煙長色帶州郭小  
曲疑藏啼猿橫恐截歸鳥流暉互蕩激下有湖壑繞  
佳處未遍經一覽心頗了秦皇遺跡泯晉士流風杳  
願探金匱篇振袂翔塵表

聞長槍兵至出越城夜投龕山

列藩遏戎亂駐鉞實此州如何殺大將王師自相讎  
我來亂始定城郭氣尚愁又聞有鄰兵倉卒豈敢畱  
促還出西門天寒絕行輶古戍暗雨雪旌旗暮悠悠  
野屋閉不守澤田棄誰收居人且奔逃游子安得休

透迤蒼山去，泱泱玄雲浮。人虎爭夜行，風榛嘯巖幽。  
我徒戒相親，一失未易求。飢拾谷口粟，寒燒澗中樵。  
神迷路多迂，再宿達海陬。雖嘗登頓勞，幸免迫辱憂。  
聖尼畏於匡，嗟我敢有尤。但慙去越早，不遂名山遊。  
夜抵江上候船至曉始行

夜辭西陵館，霜谷猿叫歇。津卒未具舟，天險不可越。  
漁商雜候渡，寒立沙上月。蒼煙隱遙汀，益覺潮漲闊。  
開橈散驚鳧，海色曙初發。矚矚前山來，稍稍後嶺沒。  
中流聞鼓角，隔岸見城闕。客路得奇觀，臨風悶俱豁。

登鳳凰山尋故宮遺跡

茲山勢將飛，宮殿壓其上。江潮正東來，朝夕似奔響。  
當時結構意，欲敵汴都壯。我來百年後，紫氣愁不王。  
烏啼辟門空，落葉滿陰障。風悲度遺樂，樹古羅嚴仗。  
行人悼降王，故老怨奸相。蒼天何悠悠，未得問興喪。  
世運今復衰，淒涼一回望。

宿湯氏江樓夜起觀潮

舟師夜驚呼，隔浦亂燈集。潮聲若萬騎，怒奪海門入。  
初來聽猶遠，忽過顧無及。震搖高山動，噴灑明月溼。  
霜風助翻江，蛟龍苦難蟄。應知陰陽氣，來往此呼吸。  
登樓覺神壯，憑險方迴立。何處望靈旗，煙中去波急。

過奉口戰場

路迴荒山開如出古塞門驚沙四邊起寒日慘欲昏  
上有飢鳶聲下有枯蓬根白骨橫馬前貴賤寧復論  
不知將軍誰此地昔戰奔我欲問路人前行盡空邨  
登高望廢壘鬼結愁雲屯當時十萬師覆沒能幾存  
應有獨老翁來此哭子孫年來未休兵強弱事并吞  
功名竟誰成殺人遍乾坤媿無拯亂術佇立空傷魂

泊德清縣前望金鰲玉塵二峰

歸遠行不緩頗失眺山水獨憐茲峰秀欲去舟且樣  
層巒迴長谿日落蒼霧起寒城動遙炊晚渡罷孤市

豈唯地景幽况乃民俗美牛羊散樹下曖曖舊墟里  
田腴收穫富縣靜爭訟止畏途遇樂境我意方一喜  
嘯歌逐漁翁暫宿浦煙裏篠疎風脩脩月偃波瀾瀾  
旅顏在塵中逢人固多恥安得託此居長年息行李  
舟次敢山阻風累日登近岸荒岡僧舍

高岸鳴枯桑湖陰北風厲寒濤洶我前幾日不得濟  
孤舟恐漂蕩石根暮牢繫憂來厭閒卧近寺聊獨詣  
雀飢殘林空人倦危磴細年荒無居僧樹死石門閉  
神傷却欲返微霰灑征袂窮冬已崢嶸故國尚迢遞  
仰看浮雲馳東路阻歸計長歎復何言吾生信多滯

過硤石

硤石頗奇壯長河出連山絕壁兩岸開行舟過其間  
高處誰解登陰藤裊難攀旁垂雨痕古仰露天光慳  
不知真宰意隨地設險艱一夫據蜀閣二世憑秦關  
賴此非要區爭奪得少閒徘徊佇望久日暮飛雲還

謁雙廟

百天寶末君王寵奸虜雄邊委強兵遺患同養虎  
叛聞遽西幸骨肉棄榛莽河北二十州義士誰禦侮  
兩公起誓衆慟哭告主祖橫身過其衝江淮保安土  
孤城無全堞百戰霜月苦力窮援不來嚙齒罵益怒

殘兵日飢疲秋風什旗鼓男兒不生降一死冠今古  
故鄉有遺廟俗祭巫屢舞丹青網塵中爽氣猶可覩  
嗟今屬喪亂戎馬正旁午臨危肯捐軀如公未多數  
獨立爲悲傷斜陽下寒楚

登海昌城樓望海

百川浩皆東元氣流不息混茫自太古於此見容德  
積陰張玄壽萬里失空色鴻鵠去不窮魚龍變莫測  
朝登茲樓望動盪豁曾臆始知滄溟大外絡九州域  
日出水底宮煙生島中國寬疑漫天爛怒欲吹地是  
常時烈風興海若不受職長堤此宵潰頓勞負薪塞

况今艱危際民若在墊溺有地不可居  
頽洞風塵黑安得擊水遊圖南附鵬翼

春日懷十友詩

余司馬堯臣

列戟衛嚴關應無休沐暇羣英罷追遊  
餘香掩空榭飛花北郭晚華月南園夜  
清景不能同蹉跎恐年謝

張校理羽

端居養恬素獨詠聖人篇夕景臨池酌  
春寒掩閣眠芳藥初翻雨新篠稍披煙  
累日虧幽訪慙余塵務牽

楊署令基

詞苑擅高步早歲許追隨屢枉瑤華句  
長依瓊樹姿齋居積冲抱園賞過芳時  
暫闕今朝會勞人耿耿思

王隱君行

共此一里居誰令阻良覲惆悵步芳園  
山櫻還獨摘風含駐花意雨散流池跡  
尊酒不來同茲晨端可惜

呂道士敏

同謂在塵境獨能依道門園齋坐永日  
庭綠靄初繁觀妙夙有契悟靜自無煩  
晨策思頻往聆君超世言

宋軍咨克

看花西澗寺憶子昔同行蘭入華觴氣  
波汎綠琴聲

茲歡隨節逝離恨坐相嬰安得重聯騎射雉出東城  
徐記室賁

晨興理櫛罷禽聲悅清旭雨餘嘉樹新色暎春塘綠  
閱景感幽悰步陰思往躅攜手此逍遙須君慰心曲  
陳孝廉則

徂春易爲感復此棲孤寂鶯啼遠林雨悵望鄉園隔  
客舍換衣晨僧齋聽鐘夕知君思正紛雜英共如積  
僧道衍

楞伽曾往問緣澗冒嵐深殘雪寒山暮幽扉閉竹林  
欲寄棲禪跡尚違捐俗心別後空遙念迢迢雙樹陰

王徵士彞

遠客歎畱滯對雨卧閒房江上歸舟阻蘼蕪春自芳  
微疴偶見侵勝賞坐成妨斯章亦何取持擬釋離腸

秋懷 十首

少時志氣壯不識秋氣悲呼儔射鳴鴈深驚東山陂  
中年漸多懷惻惻當此時登高望原陸不見車馬馳  
思我平生歡高墳鬱纍纍世人非羨門誰能久華滋  
惟有盈觴酒可以持自怡

其二

明月出遠林流輝鑿牀幃促促草下蟲催我索故衣

起歎秋夜長欲取鳴琴揮掩抑不成弄中心復乖違  
有懷難自宣勿謂知音稀

其三

蹇荷荷已老采蘭蘭亦摧無由翫芳物悵望江之隈  
木落山更空猿聲有餘哀所思去我遠佳期邈悠哉  
被垢尚可澣沫溱猶難開我愁亦可念當秋鬱難裁  
棄置勿歎息多愁損顏衰

其四

志士憂歲晚羈人感秋早騷騷鬢絲垂索索枯葉槁  
誰言衆芳歇時菊正鮮好日暮餐其英聊開我懷抱

貧賤難久居欲去恐違道時命恐未通徜徉以終老

其五

秋風夜颼颼秋色日瀟灑觀人亦心驚况乃居愁者  
塊處厭空宇命駕聊適野征鴻莫相呼牛羊亦同下  
我居久離羣憂襟向誰寫

其六

涼風動幽幔高堂夜空虛明燈無與語聊讀古人書  
古人亦何人使我不得如棄卷輒還卧終宵自欷歔

其七

鳴蟲入我戶落葉覆我井何無四方志戀此一室靜

問途欲晨征畏踐霜露冷濁醪幸方熟夕飲燭可炳  
勿憂去日多但願來日永不知苦驅馳孰若長酪酏

其八

弱齡弄篇翰出門結羣賢俛仰幾何時已有好新年  
歡晤雖常逢憂患亦屢牽世故馳人老髮鬢能久玄  
沉思復何爲省我既往愆問道行已飲中途曷歸旋

其九

朝遊荒岡陞暮行空潭側我非楚大夫何有憔悴色  
良辰思遠騁周道廣且直我馬力不前回駕仰偃息  
踟躕阻脩竹日夕睇西北苟安非予志所懼時未識

其十

弭棹望江涘日落青楓林驚波駛且廣蕩漾浮雲陰  
靡靡臯蘭衰嗶嗶渚鴻吟顧此凜節謝憂來忽傷心  
宋子悲已多潘生歎彌深自古有此愁誰云獨吾今

出郊抵東屯

故鄉一區田自我先人遺賴此容我懶不耕坐待炊  
霜露被寒野屬當斂穫時言來徵薄入稅駕宿東陂  
今年雖未豐亦足療我飢萬鍾知難稱保此復何辭

其二

州州雞登場秋稼稍狼藉疎榆蔭門巷景暗煙火夕



田家雖作苦於世寡憂戚况當收穫景斗酒復可適  
所以沮溺徒躬耕不辭劇

其三

我本東臯岷偶來往州城茲來卧農舍頓愜田野情  
如魚反故淵悠然樂其生臨去謝主媪重來自藜羹  
我非催租吏叩門勿相驚

其四

朝服久已解儼然山澤臞欲狎林野人相歡混賢愚  
朝來此水濱高歌步踟躕忽逢一田父舍耕拜路隅  
疑我是長官怪我體貌殊我已忘所有彼我未忘歟

不能使爭席心媿禦寇徒

其五

坐久體不適卷書出柴關臨流偶西望正見秦餘山  
野淨寒木疎川長暝禽還此中忽有得怡然散襟顏  
遂同樵牧歸歌笑落日間





